

Te whai hua - kia ora!

sorted
in Schools



Te Aratohu Pouako

Te Kōwae NCEA mō te
Taumata Tuatahi

NGĀ KAUPAPA A SORTED

Te KiwiSaver, Te Nama, Ngā Whāinga,
Te Whakahaere i Aku Moni

TAUMATA

1

WHIWHINGA

4

TE PAEREWĀ PAETAE

91026

Te Aratohu Pouako - Te Kōwae NCEA mō te Taumata Tuatahi

Ko tā tēnei aratohu pouako, he tiro whānui ki te kōwae a Te Whai Hua - Kia Ora! mō te Paerewa Paetae kei te Taumata Tuatahi, mō He Mea Hira te Moni.

Ka whai wāhi ngā ākonga i tēnei kōwae ki te whakawhanake i ō rātou pūkenga me ō rātou mōhiotanga āheinga ahumoni me mātua whiwhi e rātou e puta ai ō rātou ihu i te Paerewa Paetae *AS91026 Te whakamahi whakaaro tau whaitake hei whakaoti rapanga*, kei te Taumata Tuatahi.

Ngā painga o te whakamahi i ngā āheinga ahumoni hei horopaki ako pāngarau

He tino horopaki te āheinga ahumoni hei whakapakari i ngā pūkenga me ngā mōhiotanga ki te reo matatini me te tātai, ki te whakawhanake i ngā pūkenga matua, me te tūhura i ngā uaratanga. Mā te tautoko i ngā ākonga kia tū māia ai rātou, kia noho haepapa ai rātou, kia whakahaere māia ai hoki rātou i ā rātou moni, ka tautokona:

- te ekenga o te whāinga o Te Marautanga ā-Motu kia tū ai ngā taiohi “hei ākonga māia, hei ākonga whai hononga, hei ākonga kaha ki te whai wāhi atu ki ngā kaupapa, hei ākonga mutunga kore”
- te anga ihu puta o Te Marautanga o Aotearoa, inarā, ka āhei ngā ākonga “ki te āwhina, ki te whai wāhi pai atu ki te hapori”, ā, “kia angitu, kia maiea hoki ō rātou oranga.”

“Kua miramiratia te āheinga ahumoni i Te Marautanga o Aotearoa hei tauira mō ngā momo kaupapa ka taea e ngā kura te whakamahi e angitu ai ngā whakaakoranga tuinga-marau me ngā hōtaka ako.”

Te pae tukutuku Āheinga Ahumoni a TKI



He tiro whānui ki ngā rauemi ako

Ka taea ēnei rauemi ako te whakamahi hei whakaakoranga mā te pouako, hei mahi tautauāmoa, hei mahi takohe hoki rānei mā te ākongā. Kāore tēnei kōwae i waihangatia hei titiro atu ki ngā pūkenga katoa kei tētahi akoranga Tatau aro whānui. Engari, ko ngā pūkenga tatau e hāngai ana ki te whai moni, ki te whakapau moni, ki te tonono moni taurewa, ki te penapena, me te haumi moni kē te aronga. Ka whai wāhi ngā ākongā i ēnei horopaki whaihua ki te whakatinana, ki te whakaū hoki i ō rātou pūkenga matua e hāngai ana ki te whakaaro tau whitake.

Kua whakaritea ia puka hei whakamahi mā te ipurangi, hei tā rānei māu. Ki te whakamahia te ipurangi, ka taea e ngā ākongā te patopato ngā whakautu ki te puka whakaharatau.

Ngā rauemi a te pouako:

- Ko tēnei **aratohu pouako** e whakaupoko ana i ia kōwae, tae atu ki ngā hononga ki te marau me te aromatawai, me ngā kōrero e pā ana ki ngā horopaki me ngā āheinga ahumoni ka tūhuratia i ia kōwae.
- Ko te **roanga o te anga ako** e whakamārama ana i te pūtake o ngā kōwae kei ngā Taumata Tuatahi me te Tuarua, ētahi rauemi pea, he tiro whānui ki ngā horopaki ako me ētahi huarahi pea mō te hoahoa hōtaka.
- He **puka whakautu** hei hoa haere mō te puka whakaharatau a te ākongā mō ia kōwae. Māu tonu e tohu mēnā ka tukuna tēnei, kāore rānei e tukuna, ki ngā ākongā.

Ngā rauemi a te ākongā:

Kei te kōwae:

- Tētahi **aratohu ākongā** e whakamōhio ana i ngā herenga o te paerewa ka aromatawaihia ki ngā ākongā, i ngā horopaki ka tūhuratia e rātou, me ngā momo āheinga ahumoni kua kuhuna ki te rauemi.

- Tētahi **puka ākongā** e āwhina ana i ngā ākongā ki te whakawhanake i ō rātou mōhiotanga ki te kaupapa, ki ngā tukanga, ki ngā pūkenga me ngā whakaaro me mātua whai e rātou e puta ai ō rātou ihu. Ka nanao atu te puka ākongā ki ngā tauira tūturu e hāngai ana ki ngā kaupapa āheinga ahumoni a Te Whai Hua - Kia Ora!, ā, e kaha ana tana aro ki Aotearoa nei. Kei roto hoki ētahi kupu āwhina mō ngā āhuatanga ka puta pea i te aromatawai.
- Tētahi **puka whakaharatau** e whakarite ana i ētahi āheinga mō ngā ākongā ki te whakatinana, ki te whakaū hoki i ā rātou akoranga.
- Tētahi **rārangi kupu** o ngā kupu matua.

Ngā rauemi aromatawai:

Ngā rauemi aromatawai a NZQA kua whakaūngia tōna kounga, tae atu ki:

- tētahi **rauemi aromatawai**
- tētahi **tohu kounga o te aromatawai**
- tētahi **rārangi māka**.

Te aromatawai i te paerewa paetae

Kei tēnei kōwae tētahi ngohe aromatawai e taea nei te whakamahi hei arotake ōrite i ngā kokenga a ngā ākonga, e ai ki te paerewa.

Ka whakaratoa e te rārangi māka ētahi momo whakautu mō te **Paetae**, mō te **Kaiaka**, me te **Kairangi**, ā, me whakawā e te kaiako ngā momo māka ka tukuna atu.

Mō ētahi atu kōrero me ētahi atu āwhina e pā ana ki te māka i ngā paerewa, tirohia ngā āwhina āpiti kei te pae tukutuku a NZQA mō te aromatawai i ngā paerewa pāngarau.

Ngā kaupapa a Sorted

I tēnei kōwae, ka tukuna ki ngā tauira ngā kōrero, ngā tauira, me ngā ngohe e hāngai ana ki ētahi o ngā kaupapa a Sorted. Ka āwhina tēnei ki te whakapakari i ngā pūkenga, i ngā mōhiotanga ahumoni, me ngā whanonga ahumoni o ngā ākonga e hāngai pū ana ki ia kaupapa.



KiwiSaver



Te rītaia



Te haumi



Ngā whāinga



Te penapena




Te nama



Te inihua



Te Whakahaere i
Aku Moni



Te kōwae He Mea Hira te Moni

Ngā kaupapa a Sorted: KiwiSaver, te Nama, ngā Whāinga, Te Whakahaere i Aku Moni

I te kōwae o He Mea Hira te Moni, ka ako ngā ākonga e pā ana ki ngā puka utu, ki te tāke hokohoko, ki ngā pūtea taurewa ākonga, ki ngā kuhunga tūmau, ki te huamoni whakaputu, ki te KiwiSaver, ki ngā mahere pūtea, me ngā whāinga SMART.

Ko ngā pūkenga pāngarau matua ko ngā pāpātanga, ko ngā ōwehenga, ko ngā hautau, ko ngā ōrau, ko ngā tau ā-ira, ko te whakaawhiwhi, ko te raupapa paheko (BEMA), ko te whakamahi i tētahi ture tātai hei tātai i te huamoni whakaputu, ki te āpiti me te tango i te tāke hokohoko, me te panoni i te ōrau.

Ngā hononga ki ngā kokenga Āheinga Ahumoni mō te Taumata Tuano:

- **Te whakapau moni:** Whakaahuatia ngā huarahi rerekē o te whakapau moni, hei tauira, te hoko mā te ipurangi, te hoko tāpui, te hoko harangotengote, me te mahere waea.
- **Te moni taurewa me te nama:** Tātaitia, whakatauritea hoki ngā pāpātanga huamoni a ngā pēke me ētahi atu whakahaere ahumoni.
- **Te penapena me te haumi:** Whakamāramahia, tātaitia hoki te huamoni whakaputu.
- **Te moni whiwhi me te tāke:** Tūhuratia te huarahi e utungia ai te tangata, tae atu ki ngā tangohanga utu ā-tau; Te tātai i ngā tātainga

moni whiwhi mō te whakahaere ahumoni, hei tauira, i ia hāora, i ia wiki, te moni whiwhi more, te moni whiwhi peke ā-tau; te whakataurite i ngā momo herenga pāpātanga tāke; te whakamārama i te āwhina a te tāke i te oranga o te hapori.

- **Te whakamahere pūtea me te whakahaere ahumoni:** Whakamahia ngā rauemi whakahaere ahumoni hei aroturuki i tētahi mahere pūtea.

Te whakamātau i te paerewa

Me mātua whakaaro waitara whānui ngā ākonga i tēnei ngohe aromatawai hei whakatutuki i ngā mahinga hautau, i ngā mahinga tau ā-ira, i ngā mahinga ōrau, me ngā mahinga ōwehenga. Ko te horopaki ko tētahi taiohi kātahi anō ka tīmata i tana mahi tuatahi, ā, e hūnuku ana ia ki tētahi whare rēti hou.

Ka whai wāhi ngā ākonga i tēnei kōwae ki te whakawhanake i ō rātou mātauranga horopaki e whaihua ana e pā ana ki a KiwiSaver, ki te utu i a koe e mahi ana, ki te whakaea pūtea taurewa ākonga, ki te tāke, me ētahi āhuatanga o te noho whare rēti, pēnei i te utu tahi i ētahi utu.

Kei te whārangi **Rauemi mō ngā Aromatawai Paerewa Paetae ā-Roto** ngā rauemi a TKI me ngā herenga aromatawai e pā ana ki tēnei paerewa paetae.